

東

華

錄

東華錄

康熙一百七

臣王先謙敬編

臣周潤蕃恭校

康熙六十年辛丑春正月乙亥 上以御極六十年大慶命 皇
四子和碩雍親王 皇十二子固山貝子允禩世子宏晟往祭
永陵 福陵 昭陵○癸未撫遠大將軍允禴奏據平逆將軍延
信呈報大兵送達賴喇嘛至藏地安置其所經過雷東噴多等處
居住喇嘛人等感激 聖主再造宏恩罔不踊躍歡欣男女老幼
襁負來迎見我大兵羣擁環繞鼓奏各種樂器合掌跪云自準噶
爾賊兵占據土伯特地方以來父子分散夫婦離別擄掠諸物以
致凍餒種種擾害難以盡述以爲此生不能再見天日今 聖主
遣師擊敗賊兵拯救土伯特人眾我等得脫患難仍前永享昇平

樂業之福似此再造宏恩何以報答紛紛叩陳出於至誠報聞○
丁亥文武諸大臣等奏 皇上以御極六十年大慶欲 親詣
陵寢告祭誠 聖孝之至意第 皇上足疾初愈冒寒遠行恐勞
聖體且遣諸皇子等恭代 皇上詣 太廟行禮卽如 親謁
陵寢懇祈 皇上停止謁 陵 上諭朕前兩次欲親祭 陵
寢皆因諸大臣勸阻未行至今猶自追悔爾等勸朕不去朕卽不
去至三月時諸臣若勸朕升殿行慶賀禮朕亦借風寒不准所請
可也文武諸大臣再四懇求停止謁 陵 上手書諭曰諸大臣
俱有經國之任聞見甚博忠孝素著朕已深知諸大臣謂朕宜停
止謁 陵朕卽停止不知至三月大慶時諸大臣亦愛朕請停止
否若亦請停止朕心甚安否則不但朕不受慶賀之禮爾諸大臣
必且有獲咎者 上因書不辨風塵色安知天地心二語以示諸

臣諸臣回奏云臣等原爲雪大風寒懇請停止謁 陵今敬讀
聖諭不勝悚惶 上曰據奏大雪風寒明日難以起程原擇二
月初四日祭 孝陵已不及矣十一日 孝康章皇后忌辰不便祭
祀外擇十二日或十三日致祭朕於二月初旬起程已過初八日
驚蟄之後天卽和暖朕必親往

二月壬辰朔山東鹽徒王美公等僞稱將軍聚眾行劫捕獲之命
都統托賴侍郎張廷玉學士登德往訊誅其魁七人餘戍科布多
烏蘭古木○乙未 上以御極六十年大慶遣官告祭 天地

太廟 社稷○丁酉 上謁 陵啟鑾○乙巳 上謁 暫安奉

殿 孝陵 孝東陵至 仁孝皇后 孝昭皇后 孝懿皇后陵

奠酒○丁未 上回鑾○乙卯 上還京師○丁巳撫遠大將軍

允禩奏西藏雖已平定駐防尤屬緊要見畱駐彼處者扎薩克蒙

古兵五百名額駙阿寶兵五百名察哈爾兵五百名雲南兵三百名四川兵一千二百名以公策旺諾爾布總統管轄至空布地方之第巴阿爾布巴首先效順同大兵前進取藏阿里地方之第巴康濟鼐與準噶爾爲讎截奪準噶爾之人又截準噶爾兵回路第巴隆布奈親身歸附應否授以職銜伏候諭旨得旨第巴阿爾布巴第巴康濟鼐著俱授爲貝子第巴隆布奈著授爲輔國公○是月免湖廣沔陽陝西宜川等二十五州縣衛所上年被災額賦有差

三月乙丑羣臣因萬壽節請上尊號得旨諸臣奏請慶賀六十年朕心深爲不懌因將朕衷畧言大概從來所上尊號不過將字面上下轉換此乃厯代相沿陋習特以欺誑不學之人主以爲尊稱其實何尊之有當時爲臣下者勸請舉行以致後人譏議往

往有之本朝受命以來惟以愛養萬民爲務如慶雲景星鳳凰麒麟靈芝甘露天書月宮諸事從不以爲祥瑞而行慶典亦絕無封泰山禪梁父改元貽誚之舉且見今西陲用兵外則官兵披堅執銳冒暑衝寒勞苦已久內則民人負重跋涉輓運遠道力亦疲困兼之被災之處民多受累朕每念及此惟當修省圖治加惠黎元有何慶賀微賤無恥之徒謂舉行慶典必有殊恩邀望非分若奸詐輩得邀殊恩則軍前功罪輕重顛倒錢穀溷亂不明更有甚者人知六十年慶典必有殊恩故殺故犯者不少況值暮春清明時正風霾黃沙之候或遇有地震日晦幸災樂禍者將借此爲言煽惑人心恣行譏議私相紀載亦未可知今謁陵典禮已行凡詔赦恩賚等項概行停止這所奏慶賀無益不准行○諭大學士等今日出榜黃霧四塞霾沙蔽日如此大風榜必損壞或因學問優

長聲聞素著之人不得中式怨氣所致或此番中式之人將來有大奸大惡亂臣賊子亦未可知邵子於洛陽天津橋聞杜鵑卽知南人有人相者而王安石果相此皆書冊所載信有明驗自古帝王因不學問任彼書生訾議朕自幼讀書凡此等處無不研究先儒中惟朱子之言最爲確當其他書冊所載有不可盡信者如云唐明皇焚珠玉於殿前珠可焚毀而玉亦可焚毀乎又云郅治之世風不鳴條雨不破塊天地抑鬱之氣賴風以散若不鳴條則風無力何以鼓盪萬物農人墾田尙欲深耕令土破碎若不破塊何以播種而歲必荒矣又云囊螢讀書朕曾於熱河取螢數百盛以大囊照書字畫竟不能辨此書之不可盡信者也然亦有似乎荒邈而竟實有其事者東方朔記北方有層冰千尺冬夏不消今年鄂羅斯來朝以彼國地圖呈覽問其人云其地去北極二十度以

上名爲冰海堅冰凝結人不能至始知東方朔所云不謬又從前有書吏三人徧傳西邊異獸形圖部議重罪具奏朕從寬免死令其往覓必得是獸方令回來後將軍祁里德等來自軍前朕問伊等奏云果有是獸目在乳旁口在臍旁巡哨侍衛等曾親見之有一侍衛欲以鳥槍擊之爲旁人勸止蒙古名其獸爲鄂布又有飛者名爲積布飛者未曾得見蒙古名惡人爲鄂布泰積布泰是卽山海經所謂刑天爲首以乳爲目以臍爲口也故將發遣書吏等俱令放回又神異經云北方層冰之下有大鼠肉重千斤名爲鼯鼠穿地而行見日月之光卽死今鄂羅斯近海北地有鼠如象穿地以行見風日卽斃其骨類象牙土人以其骨製碗碟梳篦朕親見其器方信爲實又古人以天市垣爲中國分野朕始疑其說細玩天球合以地圖中國去赤道二十度在立夏穀雨小滿三節氣

上天市垣亦去赤道二十度恰與中國對照始知古人分野之說確有所據後人無闡發者朕細心推測方悟其理故向爾等言之此又書之不可信而可信者也總之讀書務在明理方不爲書所惑耳○己巳命磨勘會試中式原卷○庚午諭大學士等會試中式卷內勞必達等十二名文章俱劣今科著停殿試過三年仍准其殿試場內每房原派同考官二員今卷面上止有一人印記或係一人獨閱或係二人同閱是何情由該部嚴察以聞此番應試之人有學問優長不得中式以致抱屈者朕亦無從而知卽有人奏聞亦難深信如舉人王蘭生學問南人中或有勝彼者若直隸人則未能及之前周易折中性理精義朱子全書魏廷珍王蘭生等在朕前晝夜校對五年不遺一字讀書人少全讀性理者王蘭生甚爲精熟學問亦優屢試未中或文章不佳抑別有故耶再滿

洲舉人畱保學問好蒙古滿洲漢軍中罕有及者卽翰林中諒如
彼者亦少今番滿洲內巡撫蘇克濟之親屬二人俱中張伯行幕
中修書之人數年來皆相繼中式惟王蘭生畱保俱未得中此在
朕前行走之人朕深知其學問非屬偏向也王蘭生畱保俱賜進
士著一體殿試○甲戌御史陶彝任坪范長發鄒圖雲陳嘉猷王
允晉李允符范允鎬高玠高怡趙成穠孫紹曾公奏 皇上深恩
厚德浹於人心茲逢六十年景運方新普天率土歡欣鼓舞而建
儲一事尤爲鉅典懇 皇上獨斷宸衷早定儲位臣等非不知
聖明必有定見非小臣所宜輕言但臣等忠愛愚誠不能自己謹
合詞籲請伏祈 皇上睿鑒得旨著交內閣○丙子 上手書諭
旨諭諸王大臣等六十年大慶大學士王揆等不悅以朕衰邁謂
宜建儲欲放出二阿哥伊等借此邀榮萬一有事其視清朝之安

危休戚必且謂與我漢人何涉似此兇頑愚昧一無所知不顧身命宗族干犯叛逆之罪而行者亦不少王揆以伊祖王錫爵在明神宗時力奏建儲之事爲榮常誇耀於人不知羞恥王錫爵極力奏請建立泰昌不久而神宗卽崩崩時亦不甚明泰昌在位未及兩月明係神宗英靈奪其壽命天啟庸懦穉子承繼統緒客氏魏忠賢等專擅致使左光斗楊漣輩皆相繼而斃天下大亂至愍帝不能保守爲陝西馬牌子李自成所偪自盡屍首暴露東華門橋上官員無尋收者太監慈有芳覓棺殯斂至世祖章皇帝始行追封令眾漢大臣官員成服而明遂亡當時全不知孟子所云以天下與人易爲天下得人難之義故立泰昌耳亡國之賊王錫爵不能辭其罪也應剖棺斬首以祭神宗之陵神宗有靈必爲首肯王錫爵行事同時之人亦甚惡之故作詞曲極肆詆訾至我朝其

孫又入叛黨受僞劄付稱爲總兵不久被擒朕宥其殄滅九族之
罪止戮其身別無株連乃王揆不思圖報妄行陳奏其負恩可知
矣二阿哥兩次冊立爲皇太子教訓數十年不能成就朕爲宗
社及朕身計故嚴行禁錮所以不殺者恐如漢武帝之後悔致後
人滋其口舌也朕並無可悔之處見今時常遣人存問齋賜佳物
其子朕爲撫養凡此皆爲父子之私情不能自已所謂姑息之愛
也人何得因此生疑耶王錫爵已滅明朝王揆以朕爲神宗意欲
搖動清朝如此奸賊朕隱而不發可乎朕並無誅戮大臣之意大
臣自取其死朕亦無如之何朕御極六十年慶賀典禮非不可受
因深知此等事故堅辭不允朕衰老中心憤懣眾人虛誑請行慶
典朕豈屑爲此乎○諸王貝勒貝子公滿漢文武大臣等奏王揆
身受聖恩至重至厚屢加擢用至大學士前因伊姪身入叛黨

特寬其滅族之罪止將伊姪正法王揆乃背負 鴻恩結黨營私
於康熙五十六年伊將國家最大之事應候 乾斷者妄行陳奏
隨後有御史陳嘉猷等八人條奏今年二月十八日伊密奏後隨
又有御史陶彝等十二人條奏王揆忌我朝之太平結成朋黨奸
惡已極萬難姑容請將王揆及陶彝等俱革職鎖拏俟過十八日
大慶之後臣等公同從重議處得旨將朕所降諭旨爾等特示王
揆再行具奏隨將諭旨示王揆又奏臣等傳旨詢問王揆又不肯
據實認罪巧飾虛辭情尤可惡請將王揆等卽行鎖拏俟過十八
日後從重嚴加治罪奏入 閣中○御史舒庫等奏參本月初九初
十兩日有不知姓名下第舉子擁至會試副主考左副都御史李
紱門前喧闐而散得旨刑禮二部會同嚴審具奏○丙戌 上將
諸王大臣等參劾王揆等奏章發出諭大學士等曰王揆及御史

陶彝等妄行陳奏俱云爲國爲君見今西陲用兵之時爲人臣者正宜滅此朝食此係目前顯然效力之處滿洲八旗文官俱以章京派往惟在京漢官不與其內向年總督姚啟聖李之芳巡撫趙申喬等俱曾於軍前披堅立功伊等俱係漢官有何不可將伊等暫停議罪著於此番軍前照滿洲文官例委署額外章京遣往王揆年老著伊子王奕清代去俟立功回日再奏○己丑命平逆將軍延信都統武格副都統吳納哈帥師駐西藏○庚寅撫遠大將軍允禔奏據三路將軍報稱各路之馬駝糧餉俱甚充足器械俱已齊備官兵各思奮力進勦值策妄阿喇布坦人心惶惑恐懼震動之時乘此進兵可以直搗其巢穴掃蕩無遺得旨著議政大臣滿漢九卿詹事科道會同詳議具奏尋議將靖逆將軍富甯安之兵調在烏闐烏蘇地方駐紮捍禦富甯安所領兵派七千名交散

秩大臣阿喇衲甘肅提督路振聲由烏闌烏蘇一路前進取吐魯番既得之後令富甯安於阿喇衲所領兵酌量派出嚴加防守但進取吐魯番兵馬微少應於振武將軍傅爾丹處選兵三千撥過富甯安一路振武將軍傅爾丹征西將軍祁里德各於本處駐紮豫備再於祁里德所屬兵內派三千名前往以收取策妄阿喇布坦及吳梁海等逃竄之人儻若無人卽行撤回合兵一處設或此際策妄阿喇布坦內變起釁或有逃歸來順之人得策妄阿喇布坦確信三路將軍相機卽約大兵前進可以搗其巢穴矣得旨議政大臣等所議甚是朕意亦如此籌算將此行文與大將軍令三路將軍各行定議具奏

夏四月甲午命禮部祈雨○乙未賜鄧鍾岳等一百六十三人進士及第出身有差○丙申諭大學士等朕披覽史冊於前代帝王

每加留意書生輩但知譏評往事前代帝王雖無過失亦必刻意指摘論列短長全無公是公非朕觀歷代帝王廟所崇祀者每朝不過一二位或廟享其子而不及其父或配享其臣而不及其君皆因書生妄論而定甚未允當況前代帝王曾爲天下主後世之人俱分屬臣子而可輕肆議論定其崇祀與不崇祀乎今宋明諸儒人尙以其宜附孔廟奏請前代帝王旣無後裔後之君天下者繼其統緒卽當崇其祀典朕君臨宇內不得不爲前人言也朕意以爲凡曾在位除無道被弑亡國之主外應盡入廟崇祀爾等將朕此旨錄出公同從容詳議具奏○丁酉九卿等議覆山東巡撫李樹德奏汶河沙積水不盈尺應行開濬彭口一帶淤沙屢開屢塞應改挑新河一道此皆運道所關挑修難緩又太行隄爲兗西之保障其坍塌之處亦應修築查運河所關甚要改挑新河錢糧

亦甚浩繁請差部院堂官會同河道總督山東巡撫詳勘應否挑修之處確估具奏得旨著吏部尚書張鵬翮前往會勘具奏○轉賴都爲禮部尚書以托賴爲刑部尚書由都統遷○庚子諭大學士九卿等朕於河務畱心最切經歷最深往年屢次閱河時精力尙強親乘小舟不避水險各處周覽凡水泉源委皆知之甚悉山東運河全賴眾泉灌注微山諸湖以濟漕運今山東多開稻田截湖水上流之泉以資灌溉上流既截湖中自然水淺安能濟運水在地中如人身之有血氣血氣有餘方可用滲泄之藥若血氣不足正需滋養安可再加滲泄乎地方官未知水之源流一任民間截水灌田以爲愛惜百姓不知漕運實因此而誤也若不許民間偷截泉水則湖水易足湖水既足自能濟運矣今不講究本源但見湖水日少河身日淺徒事開濬假使河身日深泉水不繼雖費百萬

帑金終歸無用且古人所置南北諸閘更將何以處之古人置閘其遠近疏密皆因地形高下水勢緩急以便啟閉或一處二閘或一二十里一閘確有一定丈尺不可更易分水龍王廟閘座尤關緊要當時宋禮用白英老人之策築戴村壩以過汶水導之出鵝河口入南旺湖然後分流南北以分水口爲水脊蓋山東登萊諸山之脈自關東來結爲泰山是爲北幹分支之一在黃河之東而黃河之西山脈自終南太一南屆淮汝爲中幹分支之一黃河行乎兩支之中故昔時河自天津入海以後漸徙而南至淮安入海而登州以上馬谷山以下從無黃河之迹者山脈限之也分水口之水脊又爲泰山分支之分脊處白英積數十年精思確有所見定爲此議宋禮從之因勢均導南得七分北得三分增修水閘以時啟閉漕運遂通此等膽識後人實所不及亦不能得水平如此

之準也。今此二閘最宜斟酌。啟閉若淺於南則當閉北閘使分北之水亦歸於南。淺於北則當閉南閘使分南之水亦歸於北。湖泉並注南北合流。雖有旱暵亦無慮矣。豈若徒事開濬勞費而無益乎。往年山東百姓欲開新河。朕恐其下流泛濫降旨弗許。今巡撫請開彭口新河。此地一面爲微山湖一面爲嶧縣諸山。更從何處開鑿耶。著張鵬翮到山東將朕此旨詳諭巡撫申飭地方官令其相度泉源蓄積湖水俾漕運無誤。特易耳。黃河關係最大。自元至明歲有衝決未有安瀾。二十餘年如今日者。然圖治於已治保安於已安。河工雖已告成尤當時加巡視不可疏忽。今春多風而少雨恐秋閒雨水必多。地方官宜加意隄防。張鵬翮去看山東運河由臨清起至韓莊開離邳州不遠。並往視邳州低窪之水曾否洩出。太行隄有坍塌之處亦當往看。有賢能司官多帶幾員去地。

方有用著之處卽畱料理武英殿纂修陳鵬年熟諳河務亦著同
張鵬翮前往○丙午 上巡幸塞外啟鑾○己酉諭大學士等去
冬雪大所以今春雨澤甚少大約冬雪多則春雨必少春雨少則
秋霖必多此不必由占驗而後知也朕六十年來畱心農事較量
雨暘往往不爽且南方得雪有益於田土北方雖有大雪被風飄
散於田土無益今歲山東得雨河南山西陝西未甚得雨備荒最
爲緊要不可不豫爲籌畫若直隸山東河南已難料理至山西陝
西其補救尤難古人云三年耕則有一年之蓄九年耕則有三年
之蓄言雖可聽行之不易如設立社倉原屬良法但從前李光地
張伯行曾經舉行終無成效至於各省積貯穀石雖俱報稱數千
百萬實在存倉者無幾卽出陳易新之法亦不爲不善第春閒僅
有所出秋後並無所入州縣侵蝕入己急則卽以折銀掩飾此等

積弊朕知之甚詳其報荒之眞僞虛實朕亦無不洞悉如熱河所積穀石每年減價平糶秋後糶補還倉數目無多稽查頗易所以每有餘糧語云大兵之後必有凶年昔征勦三逆時豐收足以供給並無一州一縣貽誤及平定以後閒有歉收之年不可不綢繆於未雨也邇來稍覺旱暵或者政事有缺失應行改正之處亦未可定爾等會同詳議具奏○諭禮部朕恭謁 孝陵時 世祖皇帝保母葉黑勒氏之孫懷誠李嘉氏之子喀都禮叩請加恩朕念兩保母舊侍禁庭殫心夙夜爰從籲請特沛殊恩著贈葉黑勒氏爲佐聖夫人李嘉氏爲佑聖夫人○命給甘肅貧民穀種○丙辰以京師米貴命平糶○戊午 上駐蹕熱河○庚申命禮部祈雨○議政大臣等議覆據平逆將軍宗室延信奏臣遵旨辦完事務回至中途患病沈重不能再往藏內駐防應將延信調回京師令

署四川總督噶爾弼於年羹堯回任日仍帶定西將軍印敕統兵赴藏駐紮防守仍令都統武格參贊從之○是月免江南高郵州寶應縣上年水災額賦有差

五月壬戌議政大臣等議覆撫遠大將軍允禩奏駐紮巴爾庫爾之兵征取吐魯番其策妄阿喇布坦之人必然震恐逐漸投順來歸但甘州肅州等處之滿洲綠旗兵見俱撥往巴爾庫爾應將臣處所有之兵帶進甘州肅州駐紮爲其聲援查肅州地方褊小甘州稍覺廣闊應令大將軍允禩帶領見在西甯所有之兵前赴甘州駐紮辦理調遣之事至西甯地方緊要應派大臣一員駐紮管理得旨依議著大將軍允禩派緊要大臣駐紮西甯管理○河工效力筆帖式聶文鎭叩闡首告河道總督趙世顯侵蝕帑金縱僕受賄各款得旨張鵬翮見往江西審事著將此案交與張鵬翮確

審具奏○癸酉以署參將管四川永甯副將岳鍾琪爲四川提督
○乙亥改思明土州歸廣西太平府○戊寅諭議政大臣等從前
議欲於今年大兵進剿後經議政大臣等議進取吐魯番扼其要
地再偵探策妄阿喇布坦實信相機而行已行文大將軍允禔及
三路將軍近據大將軍允禔密奏以軍務重大欲俟明年進兵朕
意亦如此今年大兵著暫停進剿其進取吐魯番扼住要地之處
俱著停止行文各路將軍將器械馬匹口糧諸務俱令豫備整齊
俟來年進兵其閒如有可乘之機富甯安駐兵之處相近著卽酌
量而行○辛巳發倉賑直隸山東貧民停新舊賦○運河南湖廣
漕米各十萬石貯陝西備賑○甲申諭戶部朕御極六十年自沖
齡時惟以黎庶爲心宵旰圖維勤勞至今今春朕之子弟暨六世
孫輩與舉國官兵人民請行大慶典禮在朕固所應受眾亦咸以

爲宜朕意昔年辛丑係 皇考賓天之歲今歲又值辛丑況西陲
用兵事尙未竣是以堅辭不受朕躬自四月違和五月初旬又復
感寒遂覺甚病以致面色稍減或稍行動或多言語便不勝倦乏
目今直隸山東河南山西陝西麥已無收民多飢餒屢令大學士
九卿議奏茫無頭緒似此尙忍而不言將來不知何所底止也諸
大臣皆受高爵厚祿應視萬民爲一身一家各抒拯救之法若必
俟朕降諭旨推諉於朕則大臣所任何事耶今朕躬甚弱心思過
勞易倦善忘惟諸大臣是賴救民之策不可不急爲籌畫著大學
士九卿等速行詳議慎弗輕視儻再遲延時日被災之民不能待
矣○撫遠大將軍允禔奏奉旨派大臣一員駐西甯辦事查西安
將軍宗查布前曾調駐西甯侍讀學士常授辦青海事業已有年
其可否派駐之處請旨定奪得旨常授著以理藩院額外侍郎駐

紫西甯辦事宗查布著赴大將軍允禔處聽候調遣○乙酉諭大學士等陝西總督鄂海著辦理軍前糧餉四川總督年羹堯著兼理四川陝西總督事務原任侍郎革職○爾圖著署理四川巡撫事務皆馳驛速赴任○諭朕因陝西歉收雖將錢糧蠲免動支倉糧又發庫帑特差官員散賑百姓尙未安堵今施世綸亦束手無策此皆係地方官員不切實留心爲民設法綏理以致百姓流離聞陝西山西富戶積藏米石甚多若有賢能官員勸諭糶賣可以多得著將內庫銀發十五萬兩令左都御史朱軾往山西光祿寺卿盧詢往陝西再派部院賢能官員隨往每處帶銀二十五萬兩勸諭富戶照時價糶賣米石庶平易得將此旨傳示九卿○庚寅發倉賑河南山西貧民

六月辛卯朔四川陝西總督年羹堯陛辭賜弓矢等物○癸巳福

建浙江總督聶羅滿保等奏五月初六日臺灣奸民朱一貴等聚眾倡亂總兵官歐陽凱率兵往捕爲賊殺害地方有司官俱奔赴澎湖惟淡水營守備陳策率領兵民堅守淡水營地方以待救援臣聞報卽自福州前往廈門辦理軍務提督施世驃前赴澎湖臣隨令南澳總兵官藍廷珍參將林政等率領官兵赴澎聽候提臣調遣下部知之 上發硃筆諭旨命兵部發往福建交總督滿保傳諭臺灣百姓曰據督臣滿保等所奏並伊等進摺家人所言臺灣百姓似有變動又奏稱滿保於五月初十日領兵起程等語朕思爾等均係內地之民非同賊寇或因飢寒所迫或因不肖官員刻剝遂致一二匪類倡誘眾人殺害官兵情知罪不能免乃妄行強抗其實與眾何涉今若遽行征剿朕心大有不忍故諭總督滿保令其暫停進兵爾等若卽就撫自原諒爾等之罪儻執迷不誤

則遣大兵圍剿俱成灰燼矣臺灣止一海島四面貨物俱不能到本地所產不敷所用止賴閩省錢糧養贍耳前海賊占據六十餘年猶且剿服不遺餘孽今匪類數人亦何能爲耶諭旨到時卽將困迫情由訴明改惡歸正仍皆朕之赤子朕知此事非爾等本願必有不得已若情意謂與其坐以待斃不如苟且偷生因而肆行擄掠原其致此之罪俱在不肖官員爾等俱係朕歷年豢養良民朕不忍剿除故暫停進兵若總督提督總兵官統領大兵前往圍剿爾等安能支持此旨一到諒必就撫毋得執迷不悟妄自取死特諭○乙未諭九卿等滿漢大臣俱各守分惟吏部右侍郎湯右曾在九卿會議處頗多言所薦之人亦過多著解退吏部侍郎其學問尙優著專管翰林院掌院學士事○丙申諭宗人府平逆將軍延信朕親伯之孫朕之姪也此番統領滿洲蒙古綠旗兵丁過

自古未到之煙瘴惡水無人居住之絕域殲滅醜類平定藏地允稱不辱宗支克展勇畧深屬可嘉著封爲輔國公○吏部議覆四川陝西總督年羹堯奏重慶府之合州請復設銅梁縣順慶府之廣安州請復設岳池縣各設知縣一典史一再成都府之德陽灌縣安縣什邡綿竹五縣潼川州之安岳縣請各設典史一從之○戊戌禮部等衙門議覆監察御史舒庫等參奏下第舉子在副主考李紱門首喧鬧一案李紱身爲憲臣有參奏之責下第舉子羣到伊家喧鬧匿不奏聞殊屬不合應將左副都御史李紱照溺職例革職嗣後鄉會試發榜後考試官有不公之處許下第舉人生員據實赴該管衙門具控如有竟往考試官家喧鬧者該地方官卽嚴拏送刑部從重治罪得旨李紱著革職發往永定河工效力餘依議○甲辰禁商人販米出海發帑於浙江乍浦糴米三萬石

由海運貯厦門及漳泉諸府○丁未命截留漕糧二十萬石分貯大名廣平二府備荒○乙卯諭議政大臣等據富甯安奏稱策妄阿喇布坦將吐魯番回人拖克拖麻穆忒等遷往哈喇沙爾地方中途逃回在魯克齊穆地方駐紮等語見今歸順之回人與準噶爾之人爭鬪將準噶爾之人殺害取甲來獻觀此情形策妄阿喇布坦似畧無報復之意或伊同黨內有不睦亦未可定此機不可輕失朕意策妄阿喇布坦將伊等不能遷往哈喇沙爾又不能護衛準噶爾之人足見萬不能敵我兵今收復吐魯番若不看守則策妄阿喇布坦處歸順之人以及來使逃人有回人居中儻行殺掠此路必致阻隔爾等速議行文富甯安派綠旗兵一千名察哈爾厄魯特蒙古回兵一千名前赴吐魯番收納歸降回人照看駐紮將歸順之人及來使逃人往內解送之處牢設哨汛今回人歸

降於我與厄魯特世成仇敵卽係我民其巴爾庫爾相距吐魯番止六百里爲途不遠如果策妄阿喇布坦率眾侵擾我兵前去救援不遲著富甯安豫行轉飭回人萬勿隱匿侵犯卽行解送著議奏尋議回人頭目拖克拖麻穆忒等來歸應遣兵防護行文富甯安等欽遵諭旨施行其蒙古回兵令輝特公巴濟察哈爾之兵將巴爾庫爾侍衛阿玉錫著爲副都統侍衛克什圖一同帶領前往綠旗馬步兵令富甯安處所有總兵揀選一員帶領前往再令散秩大臣阿喇衲統轄前往至所需米糧作何運送之處令富甯安等酌議料理從之○丁巳諭大學士等陝西地方已經得雨漕運總督施世綸在陝西料理之事將完漕運緊要著卽將所理之事俱交與年羹堯伊可速回原任○調王景曾爲刑部左侍郎由戶部調閏六月庚申朔日有食之○以孫柱兼吏部尙書由兵部尙書兼理○癸

亥奉差山東閔河吏部尙書張鵬翮等奏臣等會同總河趙世顯巡撫李樹德查戴村壩遏汶水出南北分流濟運舊設玲瓏亂石滾水三壩年久汕刷應補葺堅實以資捍禦再山東運道全賴汶泗二水上流泉源接濟今天氣亢旱泉流微細又蜀山馬踏南旺諸湖貯水無多臣等遵旨交巡撫將坎河雞爪等泉疏濬並嚴禁民間偷截灌田又查湖向築子隄分別湖地民田界址亦令巡撫查明補築湖隄嚴禁侵種每年蓄積湖水毋致乾涸至南旺分水口係南北分流水脊實爲運道要區見在南北開口水深四尺三尺六寸不等臣等謹遵淺於南則閉北閘淺於北則閉南閘之旨畱主事富明德御史梅宗駐分水龍王廟管南北各閘以時啟閉請更於彭口內南岸建挑水壩一座北岸將沙嘴截去並將一路淤沙挑淨使彭口之水挾沙暢流直入微山諸湖則蓄洩有資運

道自無阻滯之虞矣再查邳州邱家樓一帶低窪之水從新開房
停河洩瀉並無積滯太行隄延袤數百餘里其曹縣單縣及江南
豐沛二縣坍塌之處交與河道總督修築其與直隸河南接壤者
已行文該撫一體修築下部知之○福建浙江總督覺羅滿保奏
臣調水陸各路官兵於六月初旬內陸續發往澎湖茲據提臣施
世驃咨稱臺灣鹿耳門爲賊首盤聚之所見在與總兵官藍廷珍
議合兵攻鹿耳門六月十三日已自澎湖前進下部知之○丙寅
諭大學士等每年暑熱時將犯人暫行釋放今年朕未降旨該衙
門亦未陳奏著照前暫行釋放○庚午禮部尚書蔡升元請假遷
葬允之○甲戌以長壽爲工部右侍郎

由內閣
學士遷

政使

由湖北按
察使遷

東華錄

康熙一百八

臣王先謙敬編

臣周澗蕃恭校

秋七月己亥以謝賜履爲湖北按察使由直隸天津道遷○福建水師提

督施世驃奏臣聞臺灣地方匪類竊發卽率領舟師出洋先抵澎

湖嗣於六月十六日抵臺灣鹿耳門官兵奮勇前進擊敗賊兵遂

乘勝進港克取安平二十二日進攻臺灣府治賊眾敗遁恢復臺

灣賊首朱一貴等爲大軍所逼逃匿諸羅縣尾溝莊地方被鄉民

擒獻解送軍前餘賊聞風逃散臣等一面派遣官兵四路搜緝相

機剿撫一面安撫居民令各安生業得旨覽奏賊首朱一貴已被

擒獲餘賊或剿或撫居民各安生業海宇清甯知道了該部知道

○諭兵部臺灣變動時淡水營守備陳策擒殺亂民苑景文等防

護淡水營地方能鼓勵兵民協同堅守殊屬可嘉陳策著從優加
爲左都督升授臺灣總兵官與陳策同事官兵俱著從優議敘○
庚子福建巡撫呂猶龍以福建浙江總督覺羅滿保丁母憂具奏
得旨臺灣新經恢復一切整頓地方及調補官員等事急需料理
滿保著在任守制○辛丑命副都統穆克登貝勒丹金多爾濟將
喀爾喀兵赴巴爾庫爾軍前參贊軍務○己酉 上行圍發熱河
○甲寅福建水師提督施世驄奏臺灣所屬南北兩路地方距府
治遙遠臣抵臺灣北路隨調參將林政等帶兵進剿南路遊擊林
秀等帶兵進征北路再遣遊擊朱文等直趨北路朱羅山後追捕
賊黨今據林政等報南路賊眾與臺灣耕種粵民構難於六月十
九日在漫莊地方被粵民殺敗迨官軍繼至乘勢追捕賊目鄭廷
瑞等已被千總阮欽把總李興盛等擒殺餘夥盡皆逃散據林秀

等報北路賊眾於六月二十八日在大木降地方被官兵截殺死者甚多餘眾悉降報聞○諭兵部臺灣賊首朱一貴等俱已擒獲著行文該督將朱一貴等押解來京審明之後正法示眾○是月免河南鄭州祥符等四十五州縣旱災額賦有差

八月庚辰福建浙江總督覺羅滿保奏查臺灣起釁情由本年三月內因賊首朱一貴在鳳山縣結黨聚眾知府王珍遣人往捕瀕將旁人林連需索朱一貴等乘機於四月十九日豎旗倡亂遊擊周應龍帶領營兵及土番赴剿土番殺無辜數人焚毀道旁廬舍賊遂偪脅莊民隨從拒敵至二十七日周應龍敗回賊陷臺灣府治朱一貴等蓄謀爲惡知府王珍匿情不報縱役生事遊擊周應龍縱番妄殺又戰敗逃回罪俱重大臺廈道梁文宣同知王禮事前通同隱匿臨時一無備禦退回澎湖罪俱難追臺灣縣知縣吳

觀械諸羅縣知縣朱夔水師遊擊張彥賢等俱請一併發審分別定擬得旨臺灣府文職官員平日並不愛民但知圖利苛索及盜賊一發又首先帶領家口棄城退回澎湖殊屬可惡道員以下文職官員俱著提拏交總督滿保提督施世驃會同審明卽發往臺灣正法並查伊等家產給賞效力有功之人所參遊擊張彥賢等亦俱著解任交該提督總督會同審明定擬具奏○丙戌直隸總督趙宏燮奏長垣縣之甄家莊王家隄兩處隄工被水衝決下流之東明縣滑縣開州俱被水淹查衝決之故因上流之河南武陟縣等處隄工有決口三處又兼以沁河之水亦由胙城縣入滑流至長垣東明甄家莊王家隄兩處隄外水面比隄內地高一丈有源之水日漸加長故決口頗難堵築若上流之決口一日不堵則長邑之水一日不退臣一面奏明一面移咨河南撫臣飭令道府

等將決口相機堵築以防後患下所司知之○戊子 上駐蹕博
洛河屯賜來朝外藩銀幣鞍馬及隨園蒙古官兵銀布○是月免
江南沛縣旱災甘肅甯州雹災額賦有差

九月辛卯 上還熱河○甲午諭大學士等黃河遷徙無常每有
衝決隄岸淹沒田廬之患昔黃河會九河從天津入海後漸遷徙
而南約計遷徙之地已千餘里矣漢武帝塞瓠子口嗣後代有衝
決朕畱心河務屢行親閱動數千萬帑金指示河臣將高家堰石
隄及凡應修築之處悉行修築奏安瀾者幾四十年於運道民生
均有裨益前巡幸至湖灘河朔保德州橫城潼關孟津徐州宿遷
邳州桃源清口等處俱曾渡河自橫城舟行順黃河下流歷人所
未經行之河套直達數千里所至之處無不詳視惟孟津渡河時
因淤沙不能直渡紆道而行彼時朕卽慮沙淤則流滯隄岸必致

衝決今據報黃河衝決流入沁河泛溢至直隸長垣縣等處若今冬將決口堵築堅固可保無虞否則自決處以下勢分沙壅河水斗長隄岸之危非一所矣此事著問九卿具奏○四川陝西總督年羹堯奏定西將軍噶爾弼領兵赴藏行至瀘定橋患病不能前進得旨噶爾弼患病調養尙需時日其將軍印著齎付公策旺諾爾布署理額駙阿寶都統武格俱著參贊軍務○丙申吏部等衙門議覆給事中常岱等奏科道官有從編修檢討補授者應歷俸幾年後開列內升外轉請敕下九卿定議查編修檢討俱屬七品嗣後編修檢討改授科道之員應照由郎中補授科道內升外轉之例歷俸二年准其開列從之○奉差山西賑濟左都御史朱軾奏請於晉省建立社倉以備荒歉引泉漑田以興水利得旨建立社倉之事李光地任巡撫時曾經具奏朕諭以言易而行難爾可

姑試李光地行之數年並無成效民多怨言張伯行亦奏言社倉頗有裨益朕令伊行於永平地方其果有成效裨民之處至今未奏且社倉之有益無益朕久已畱心採訪凡建立社倉務須選擇地方殷實之人董率其事此人並非官吏無權無役所借出之米欲還補時遣何人催納卽豐收之年不肯還補亦莫可如何若遇歉收更誰還補耶其初將眾人米穀扣出收貯無人看守及米石缺空之時勢必令司其事者賠償是空將眾人之米棄於無用而司事者無故爲人破產賠償矣社倉之設始於朱子其言具載文集此法僅可行於小邑鄉村若奏爲定例屬於官吏施行於民無益前朕巡幸西省山陝地方山川形勢俱悉知之其地山多水少閒有水泉亦不能暢引溉田設果有灌注之水前人豈不知乎今朱軾以建立社倉引水入田具奏此事不必令他人辦理卽令伊

久住山西鼓勵試行若所言有效甚善該部知道○庚子先是

上諭議政大臣等阿喇納看守吐魯番地方恐兵勢單弱應行文將軍富甯安酌派官兵遣往吐魯番駐紮至是靖逆將軍富甯安奏臣欽奉 上諭派兵二千名令副都統莊圖管領於八月十六日起程前赴吐魯番今又續派兵二千名令副都統穆克登等管領往吐魯番於九月初三日起程昨據散秩大臣阿喇納報稱十月內雨雪之際擬乘賊之不備進兵襲擊雖吐魯番兵勢並非單薄但恐前往襲擊或有賊兵來乘我軍之後亦未可定臣請親率兵四千進駐伊爾布爾和韶接應調遣其巴爾庫爾畱兵三千請交與都統睦森管領得旨交與議政尋議政大臣等議覆富甯安奏請派兵吐魯番移駐伊爾庫爾和韶之處俱應如所奏但今冬雨雪之時可就近地襲擊不宜深入應行文富甯安令阿喇納襲

擊之兵相機前進卽行整旅而回從之○壬寅諭大學士九卿等直隸總督趙宏燮奏河南黃沁衝決隄岸水勢泛溢至長垣等處朕卽遣郎中傅爾賽查視所決地方據奏河南武陟縣黃沁之水衝決隄岸由長垣流入山東張秋鎮又據山東巡撫李樹德奏河水泛溢自直隸開州流入山東張秋鎮等處由鹽河入海以致運河隄決漕船阻滯其衝決隄岸見在修築朕思此衝決之處止可畧爲修防使漕船無阻如竟行堵塞水無歸洩之地他處又必衝決斷乎不可開州係古黃河故道今黃沁泛溢由開州至山東地方已成河道矣將來堵塞完工不使沁水入黃直引至山東或有裨益亦未可定朕畱心河務各處黃河渡口俱曾親歷適遣往看河之官所呈圖樣及李樹德所進河圖朕俱詳覽知之最明爾等繕寫諭旨發往張鵬副處伊所審事畢著卽會同總漕施世綸至

張秋鎮等處詳行查勘料理使漕船往返不至遲誤如張鵬翮已回卽於接旨之處作速前往至修築決河甚屬緊要朕自京中另遣專官著總河趙世顯將熟練河務官員工役派出並將修築物料多行豫辦速發往河南衝決地方○癸卯 上回鑾○乙巳以

吳爾台爲內閣學士

由詹事遷

○丙午大學士等以九卿議覆黃河衝

決一摺面奏 上出河圖諭曰朕畱心河務於直隸山東河南地方皆所親歷詳視水之源委洞悉於衷故指示繪畫此圖近因山東巡撫李樹德奏稱黃沁二水泛溢自開州流入張秋鎮等處曾諭爾等堵築河口之後不使沁水入黃引入山東漕河有裨運道而前詢問九卿之處則止及黃河衝決情形未及引沁入運之事今覽九卿摺奏堵築黃河決口引沁入運所議深合朕心爾等將此圖看畢發與九卿卽令定議具奏其直隸山東河南被水之民

著該督撫查明賑濟至堵築黃河決口引沁入運事朕另遣大臣
前往○辛亥諭近御侍衛等爾等日侍朕側於朕心憂勞之處差
知大概若百官萬民何從而知朕日理萬幾其他姑置勿論即每
年春時爲雨水田禾時刻不忘畱心究問直至秋成始稍釋念至
於冬月內地常恐雪少口外地方又恐雪大此等苦心惟身歷方
能知之卽爾等日侍左右者亦未必悉知也○癸丑議政大臣等
議覆靖逆將軍富甯安奏據散秩大臣阿喇納報稱九月初八日
探知策妄阿拉布坦遣人犯吐魯番城隨派侍衛克什圖等領兵
迎戰阿喇納親率官兵尾後策應行至中途見有二千餘賊與克
什圖之兵列陣對壘因將所領策應之兵分爲三隊奮力衝殺賊
眾不能抵敵敗入林中官兵追勦入林賊復棄騎步戰我師槍礮
齊發擒殺賊兵百有餘人獲軍器馬匹甚多賊眾奔逃我師追捕

數十里因時已薄暮不便深入仍派公巴濟等率兵五百埋伏林中偵探防守餘兵撤回查吐魯番地方恐有賊兵窺伺先經奉旨添兵駐紮今果符 聖算克奏捷功臣請於闊舍圖駐兵之處再增派五百兵俄隆吉駐兵之處再增派三百兵防賊人由瀚海一路犯我哨汛又闊舍圖俄隆吉與阿爾泰一路甚近儻遇有事亦便於接應調遣臣前因阿喇納報今冬雨雪之時欲進兵襲擊故奏請移駐伊爾布爾和韶爲之聲援今賊人敗遁盡知我師在吐魯番等處則邊境地方必恐懼防備不宜襲擊阿喇納今冬進兵之處應暫令停止臣仍統兵駐防巴爾庫爾俟來年大舉進剿應如所奏從之○左都御史朱軾奏臣從前奏晉省請立社倉兼興水利奉旨令臣試行臣仰惟 皇上至聖至明於民間利弊及山川土地之宜無不洞悉一時冒昧陳言今細加籌畫實屬難行伏

祈 皇上俯鑒臣愚免令試行得旨朱軾親至山西深知地方情形既請立社倉興水利著仍畱山西鼓勵試行○乙卯 上還京師○丙辰九卿等遵旨議覆堵築黃河決口引沁入運之處俟派出大臣令其會同總河及該督撫等詳勘議奏 上諭大學士等堵築黃河漫溢工程此第一緊要之事著左副都御史牛鈕侍講齊蘇勒員外郎馬泰前往監修其堵築時宜先於上流建挑水壩以減水勢俟沙淤後再漸次加築則漫溢之勢自平而堵塞不甚費力矣朕於清口建築挑水壩時曾經指示此事齊蘇勒馬泰等悉知之至於前項工程毋得吝惜錢糧河南地方河底不凍今冬宜作速興築其建挑水壩之時應挑引河黃河有曲折之處卽成洲渚務詳勘酌量取直挑成引河俟黃河決口堵塞報竣後再引沁濟運分水龍王廟之中八間北八間春時水淺船行有阻應將

沁水卽於此處引入運河如不能容納由鹽河瀉其水勢自於運道有益分水龍王廟南八開水多不須濟以他水再徐州下流黃河無虞獨徐州上流黃河多有沙淤不可不防衝決將此旨宣諭該管各官豫先防備○丁巳授駐紮吐魯番散秩大臣阿喇納爲協理將軍○蒙古王貝勒貝子公台吉及土伯特酋長等奏西藏平定請於招地建立豐碑以紀盛烈昭垂萬世上允所請御製碑文曰昔者太宗文皇帝之崇德七年班禪額爾德尼達賴喇嘛願實汗謂東土有聖人出特遣使自人迹不至之區經讎敵之國閱數年始達盛京至今八十載同行善事俱爲施主頗極安甯後達賴喇嘛之歿第巴隱匿不奏者十有六年任意妄行拉藏滅之復興其法因而允從拉藏青海羣衆公同之請中間策妄阿喇布坦妄生事端動準噶爾之眾肆行奸詐滅壞達賴喇嘛並

廢第五輩達賴之塔辱峨班禪毀壞寺廟殺戮喇嘛名爲興法而實滅之且欲竊據土伯特國朕以其所爲非法爰命皇子爲大將軍又遣朕子孫等調發滿洲蒙古綠旗兵各數萬歷烟瘴之地士馬安然而至賊眾三次乘夜盜營我兵奮力擊殺賊皆喪膽遠遁一矢不發平定西藏振興法教賜今胡必爾汗冊印封爲第六輩達賴喇嘛安置禪榻撫綏土伯特僧俗人眾各復生業於是文武臣工咸謂王師西討厯瘴癘險遠之區曾未半載輒建殊勲實從古所未有而諸蒙古部落及土伯特酋長亦合詞奏曰皇帝勇畧神武超越往代天兵所臨邪魔掃蕩復興蒙古向所尊奉法教坎麻藏衛等部人眾咸得拔離湯火樂土安居如此盛德大業非臣下頌揚所能宣罄請賜御製碑文鐫勒招地以垂永久朕何功焉而羣眾勤請不已爰紀斯文立石西藏俾中外知達賴喇嘛等三

朝恭順之誠諸部落累世崇奉法教之意朕之此舉所以除逆撫順綏眾興教云爾○議政大臣等議奏據駐紮西藏額駙阿寶移稱青海索羅木地方之西有郭羅克部落唐古特等肆行劫掠往來行人曾將駐紮索羅木兵馬盜竊而去查郭羅克地方與歸附我朝之多隆汗地方相近應行令多隆汗曉諭伊等嗣後宜遵守法度不得仍前肆行儻伊等不遵訓諭請卽發兵前往將首惡之人懲治令多隆汗於伊屬下之人揀選有材幹者使爲郭羅克部落之首則西甯青海等處往來使人及商販之人俱獲安靜應如所請得旨額駙阿寶請將郭羅克部落懲治所言甚當郭羅克地方近四川松潘一路與多隆汗接壤應行文總督年羹堯提督岳鍾琪等著向多隆汗處詳詢郭羅克地方形勢若何發兵進剿用力幾何如易於攻取卽令岳鍾琪帶領松潘兵進剿儻地險勢眾

應酌量派遣滿洲蒙古兵丁及附近之察罕丹津處亦令派兵協助前往進剿著大將軍允禩侍郎常綬總督年羹堯提督岳鍾琪會同定議而行○署甘肅巡撫盛京戶部侍郎花鄯緣事降調冬十月壬戌福建浙江總督滿保等奏臺灣等三縣相距遼遠又隔重洋防汛額兵未免單薄伏請添兵 上諭大學士等福建總督巡撫提督俱奏請臺灣添兵朕意添兵無用也臺灣地方水師營著副將一員兵二千名陸路營著副將一員兵二千名駐紮水師有事陸路可以照應陸路有事水師可以照應其臺灣總兵官移於澎湖亦著兵二千名駐紮令其管轄俾有裨益至駐紮之兵不可令臺灣人頂補俱將內地之人頂補兵之妻孥毋令帶往三年一換每年自京派出御史一員前往臺灣巡查此御史往來行走彼處一切信息可得速聞凡有應條奏事宜亦可條奏而彼處

之人皆知畏懼至地方事務御史不必管理也將此旨傳示九卿
○癸亥諭大學士等盛京戶部侍郎缺著戶部理事官保德升補
盛京理事官事甚簡少嗣後俱不必再行補授○議政大臣議覆
四川陝西總督年羹堯奏郭羅克各寨有隘口三處俱屬險峻利
用步卒不宜騎兵若多調官兵恐口外傳聞使賊得潛爲準備不
如以番攻番量遣官兵帶領較爲便易臣向知郭羅克附近之地
如雜谷等處土司土目亦皆恨其肆惡願出兵助勦臣自陛辭回
任卽與提臣岳鍾琪商議遣官約會雜谷土司等據稱宜及時進
勦恐冬天雨雪凍阻難行適據額駙阿寶移文奉旨命臣與岳鍾
琪酌量進勦事宜臣遵卽移咨提臣令速赴松潘選領鎮兵出口
並督率土兵前進其西甯滿洲兵及青海蒙古等兵不必再行調
遣應如所奏從之○甲子以湖廣布政使阿林爲太僕寺卿○奉

差閱視河工原任知府陳鵬年奏河臣趙世顯委臣勘明河南武陟縣釘船幫決口臣查看黃河老隄衝開八九里見今大溜直趨決口者約五六分老河內止存四五分急應堵築臣愚以爲對岸上流之廣武山下淤灘上另開引河一道使溜南趨再於決口稍東逢灣取直開一引河止長三里餘引溜東行仍歸正河方可漸次堵築得旨朕每畱心河務黃河衝決之處一經奏聞卽指示繪圖諭總河趙世顯派出熟練河務官員多備物料工役遣副都御史牛鈕等將堵築事宜詳晰指示其修補山東運河已交與尙書張鵬副等今覽陳鵬年所奏皆與朕前所頒諭旨相同該部知道○丙寅賑臺灣風災○議政大臣等議覆撫遠大將軍允禴奏賊厄魯特侵犯吐魯番爲我兵所敗鼠竄而去來年不可不大舉進剿盡行剪滅但事關重大請容臣輕裝赴京恭請訓旨應如所請

得旨大將軍允禔令其來京將印交與平郡王訥爾素此際若策妄阿喇布坦所屬有自相離潰率眾來歸者則大將軍停止來京可速赴肅州將軍祁里德亦令來京將印交與都統圖拉將軍傅爾丹軍前之前鋒統領丁壽護軍統領覺羅圖拉亦令將伊等事務交明來京將軍富甯安亦令於軍中派一可託大臣來京俱於年內到京以便指示來年大舉進剿方畧○辛未諭大學士等原任大學士熊賜履居官清正學問優贍朕每念舊勞不忘於心其長子素有風疾其孫亦故所存幼子二人朕每諭織造李煦曹頌周恤其家今其二子來京觀其氣質尙可讀書熊賜履屢爲試官所取門生不下千人身後竟無一顧恤其家者朕於故舊大臣身歿之後不時存問蓋共事日久不忍忘懷待滿漢臣工皆然朕天性如此也當熊賜履居官時政事言論有不當者朕未嘗不加訓

飭卽凡大臣皆然及已去位身故則但念其好處如李燾王熙之
孫勵杜訥之子俱見爲京職身居大位見在大學士王頊齡之子
王國炳亦在內廷行走沈奎之子沈敬宗爲人參劾朕念伊父存
日勤勞姑畱其職杜立德張玉書之家時時問其子孫如何至於
讀書學問之事必思及李光地其子弟亦見爲官職此皆爾等所
知也今熊賜履二子家甚清寒爾等亦應共相扶助令其讀書俾
有成就○以盧詢署甘肅巡撫由光祿寺卿遷○丙子賜林德鏞等一百
十人武進士及第出身有差○丙戌諭兵部施世驃效力年久勞
績懋著沿海水師營務極爲諳練簡任提督整飭營伍實心盡職
當臺灣海寇竊發卽調遣官兵親渡海洋屢次大敗賊眾七日內
克復臺灣擒獲賊首朱一貴等俾地方甯謐克奏膚功殊屬可嘉
海疆要地正資料理忽聞將星隕落臺灣朕心實爲悼念著給還

所降之級其加宮保賜卹之處著察例具奏伊所借藩庫銀一萬兩著賞給不必償還將伊安葬福建之處著照伊所請行此諭著徧諭督撫提鎮○免福建臺灣等三縣風災額賦有差

十一月辛卯諭吏部總河趙世顯見在河南著卽從河南來京其總河印務著陳鵬年署理○壬辰諭大學士等原任總督額倫特侍衛色楞副都統查禮渾皆陣亡伊等世職俱著承襲又陣亡提督康泰總兵官康海司九卿俱著議敘伊等有世職亦著承襲西安佐領扎木素漢仗好在軍中頗出力索倫之藍翎扎倫察漢仗好交戰時頗英勇射死數賊身受重傷自盡俱著交部議敘○癸巳四川陝西總督年羹堯奏參革西安府知府徐容鳳翔府知府甘文煊虧空銀米一案據布政使塔林等詳稱徐容甘文煊供前任總督鄂海幕賓朱性本陳子和及原任布政使薩木哈幕賓嚴

堂等通同作弊以致虧空請 皇上遣大臣一員赴陝與臣會同
研審得旨著朱軾前往會同總督年羹堯審明具奏○辛丑左都
御史黨阿賴以疾乞休允之○己酉 上幸南苑○癸丑撫遠大
將軍允禩至南苑陛見○是月免浙江錢塘衢嚴等二十五縣所
旱災額賦有差

十二月乙丑吏部尙書張鵬翮等奏臣等遵旨由山東張秋循流
而上一一查看黃河決口在武陟縣之釘船幫支河口由此衝入
詹家店之魏家莊及馬營口今副都御史牛鈕會同河南巡撫楊
宗義於支河口築攔水壩魏家莊已經堵塞馬營口之消落指日
成功其引沁入運之處臣等至武陟縣相度地勢西北高而東南
下沁隄內地較沁河涯低有一丈從此而東則地形愈低若引水
從高直下恐牽動全沁灌入內地而黃河隨其後亦未可定山東

運道其在張秋一帶則有沙河等水分水龍王廟一帶則有南旺等湖濟甯一帶則有馬場等湖又有諸山之泉本可濟運止因湖隄殘缺民間竊種湖旁之地未曾蓄水而諸泉壅塞又未盡疏以致漕艘時患淺阻臣已將各湖築隄蓄水及疏濬泉源之處交與山東巡撫李樹德料理則運道自可通利得旨前因運河水小引沁入運或有裨益是以下旨令張鵬副等回奏甚屬明晰卽令照伊所奏不得稍有更改○丁卯命截留浙江漕米二十萬石分貯杭州各府備賑○辛未吏部刑部奏吏部尙書張鵬副等察審河工效力革職筆帖式聶大煊叩關控告河道總督趙世顯侵欺歲修帑金及縱容家人受賄各款雖屬虛誣但趙世顯將丁憂未滿之張秋通判張鎬委署天津同知又於康熙五十四年將聶大煊委署海防同知續經總漕施世綸因聶大煊有玷官箴勒令卽事

乃趙世顯於康熙五十八年復委署印明係徇庇趙世顯應於此
二案內每案降二級調用張秋通判張鎬應於補官日降三級聶
大煊又有侵吞鹽課入己一事不便照誣告律治罪應將聶大煊
解部質審從重治罪從之○工部議覆副都御史牛鈕等奏沁黃
兩河交匯之處至詹家店共十八里原無隄工遇沁黃兩河之水
齊發水勢彼此相激大溜退回每於此處泛溢且河岸高不過三
尺兩河之水相激以致河底漸長河岸卑矮應自沁河隄岸接至
滎澤縣之大隄建築遙隄以護禦沁黃兩河之水方無退回之虞
得旨依議速行○王申四川提督岳鍾琪奏勦撫郭羅克番人俱
已平定得旨據岳鍾琪奏番賊伏兵千餘突出對敵被我土兵連
敗數陣逃奔過河復攻取下郭羅克之吉宜卡等二十一寨殺死
賊番甚多連夜進兵直抵中郭羅克之納務等寨賊番猶復對敵

我兵奮不顧身自卯至酉連克一十九寨斬殺三百餘級擒獲賊首酸他爾蚌索布六戈復親督官兵抵上郭羅克之押六等寨正欲攻取該寨頭目旦增等將首惡假磕並爲從格羅等二十二名綁縛獻出率領闔寨男婦老幼叩頭求饒止將爲從賊番盡行正法首惡酸他爾蚌索布六戈假磕解送等語殊屬可嘉著議敘具奏○丙子蘇克濟丁母憂解任以德音署山西巡撫由內閣學士遷○丁丑上還暢春園○轉陳元龍爲禮部尙書由大理寺卿遷以安鮎爲左都御史由都抗遷張大有爲左副都御史由大理寺卿遷○以朱綱爲河南按察使由直隸遷○癸未上還宮○遣總督鄂海按察使永泰往吐魯番屯田○是月免浙江安吉於潛等十一州縣旱災額賦有差○是歲朝鮮安南琉球來貢○人丁戶口二千九百一十四萬八千三百五十九又永不加賦滋生人丁四十六萬七千八百五十四

地山蕩畦地七百三十五萬六千四百五十頃五十九畝有奇徵
銀二千八百七十九萬七百五十二兩有奇米豆麥六百九十萬
二千三百五十三石有奇草四百八十六萬四千四十九束茶五
十九萬五千五百七十引行鹽五百一十一萬四千五百四十引
徵課銀三百七十七萬二千三百六十三兩有奇鑄錢四萬三千
七百三十二萬五千八百有奇

臣王先謙敬編

臣周澗蕃恭校

康熙六十一年壬寅春正月戊子召八旗滿洲漢軍文武大臣官員及致仕退斥人員年六十五以上者六百八十人宴於乾清宮前命諸王貝勒貝子公及閒散宗室等授爵勸飲分頒食品○辛卯召漢文武大臣官員及致仕退斥人員年六十五以上者三百四十人宴於乾清宮前命諸王貝勒貝子公及閒散宗室等授爵勸飲分頒食品如前禮御製七言律詩一首命與宴滿漢文武大臣官員各作詩以紀其盛名曰千宴宴詩○庚子諭議政王大臣等策妄阿喇布坦之兵屢被我師擊敗死傷頗多策零敦多卜等賊眾亦大半死亡棄藏逃奔仍退回伊里地方固守三嶺

若我滿洲兵至則捨命交戰勢有不敵又思逃避他所希圖存活此等情形瞭然可睹朕數日來細加尋繹伊里山蹊險隘我天朝大兵雖欲今年進剿儻爲山嶺阻隔遲延時日或策妄阿喇布坦戰敗帶領妻子逃遁則我師應否追剿不可不詳加定議今策妄阿喇布坦之伎倆悉已深知卽策妄阿喇布坦亦稔知天朝兵威所加勢必不能自存但此時遽遣使往策妄阿喇布坦處招撫彼不知我寬仁之意反以爲我兵不能取彼復生他心亦未可定爾等可議寫發往策妄阿喇布坦之書著澤卜尊丹巴胡土克圖選派好喇嘛爲使作速差往其差往之人過阿濟嶺由土魯番一路前往不久可到彼處信息情形亦卽得聞知如胡土克圖之使善爲曉諭策妄阿喇布坦畏懼天討將拉藏妻子家屬竝從前被擄之人送來請罪誠心投順永不敢侵犯邊隅如此可另行商酌儻

策妄阿喇布坦已死或伊處內變生亂除向天朝投誠外彼將焉往則我兵進發亦不可緩卽一面進兵一面差使亦可今各路兵丁或向伊里前進或在吐魯番固守漸近烏魯木齊等處駐紮營寨相機而行或幾路往前襲擊以及大兵糧餉作何運到之處著議政大臣軍前調回將軍大臣會同覈議妥確具奏尋議 上諭周詳深遠令澤卜尊丹巴胡土克圖差人向策妄阿喇布坦處說撫且可得彼處形勢確信謹將交與胡土克圖發往策妄阿喇布坦之書繕寫呈覽後令胡土克圖派好喇嘛齋往彼果誠心歸順卽報明駐紮土魯番協理將軍阿喇納相機行事至於大兵向伊里前進事關重大未敢懸議似宜暫行停止其在土魯番駐兵固守或進烏魯木齊等處樹立營寨應行令將軍富甯安阿喇納等遵行外竝將牧放牲口耕種地畝修造城池處所及巡防汛界接

運糧餉之事一併詳加覈議具奏但自吐魯番往哈拉沙爾地方
共有兩路或係沙漠水少之地或係山巒險隘之區若前進襲擊
所需兵丁幾何糧餉作何接運亦令富甯安阿喇衮等查明定議
具奏見今巴爾庫爾所有綠旗官兵五千名應令發往吐魯番築
城種地駐防此五千兵卽整理起程其一應軍需農器交與將軍
富甯安總督年羹堯巡撫綽奇辦理發往得旨依議其向伊里進
兵之事議令暫停俟有機會行事此議甚是其綠旗步兵五千名
議令發往吐魯番亦甚是巴爾庫爾距吐魯番不遠催趨行走六
七日可到但綠旗兵丁每二人共馱馬一匹所馱乾糧俱於此馬
馱載若有倒斃勢必用他馬分馱惟恐負重以致馬匹多損漢人
不能喂養馬匹著將此綠旗兵丁乾糧俱於官馬馱載另分隊伍
派人管轄輓送再交與澤卜尊丹巴胡土克圖發往策妄阿喇布

坦之書詞句稍繁俟朕刪改發往○乙巳以李先復爲工部尙書

由兵部左侍郎遷

○戊申 上巡幸畿甸啟鑾

二月己未直隸總督趙宏燮奏正月二十三日長垣縣常村集隄

外有濁水從西北而來高二三尺不等臣隨飛飭大名道帶領河

官加意防護外竝委員星速前往查看發水源頭報聞○命副都

御史牛鈕視長垣決河○轉特古忒爲理藩院左侍郎以常授爲

理藩院右侍郎

由額外侍郎遷

○癸亥工部議覆河南巡撫楊宗義奏武

陟縣所築釘船幫大壩南岸尾隄原在新淤灘上正月初六日被

水衝陷臣隨赴工所查勘卽於尾隄勘築月隄乃積凌隨溜湧激

南岸尾隄塌斷二十餘丈漫溢新築月隄加以雪消水漲十七日

驟至李先鋒莊壩下由淤灘漫過十八口水凌排山而下直趨馬

營口頃刻水與隄平至塌十餘丈見在帶領河官晝夜補築等語

見令該撫親督道府及河官不分晝夜補築堅固剋期完工得旨依議速行○乙丑以蔡珽爲翰林院掌院學士兼禮部侍郎

由少詹事

○庚午諭大學士等署理雲貴總督事務提督張文煥著來京陛見總督事務著廣西巡撫高其倬馳驛速往署理○甲戌署河道總督陳鵬年奏河南武陟縣釘船幫及馬營口隄工俱經副都御史牛鈕等修築告竣奏報在案臣在清江浦飭催河南各處工程今據河南河道呈稱冰消水長黃河大溜泛溢將釘船幫南壩子隄及馬營口隄工塌陷臣於二月初十日親赴河南會同巡撫楊宗義查勘情形設法堵築下部知之○丙子 上還京師○庚辰朝鮮國王李昀奏臣不幸自幼多病氣甚痿弱嗣續絕望臣弟延成君李吟聰明孝友年又長成臣既無子請將李吟錫以世弟之號以續宗祧得旨該王以本身甚弱懇請將伊弟李吟封爲世

弟著照所請○乙酉命禮部祈雨○左都御史朱軾乞假葬父省

母允之○以孔毓珣爲廣西巡撫

由四川布政使遷

三月丙戌朔轉王度昭爲兵部左侍郎以張大有爲兵部右侍郎

由左副都御史遷

○乙未諭大學士都統副都統等前因兵丁舊廬住房

不敷朕特降諭旨多發庫帑於八旗教場蓋設房屋令伊等居住

近看八旗兵丁愈多住房更覺難容朕因思鄭家莊已蓋設王府

及兵丁住房欲阿哥一人往往今著八旗每佐領下派出一人令

往駐防此所派滿洲兵丁編爲八佐領漢軍編爲二佐領朕往來

此處卽著伊等看守當差著八旗統領會同佐領等派往○丁酉

以戴鐸爲四川布政使

由廣西按察使遷

○己亥以金應璧爲左副都御

史

由奉天府尹遷

○戊申雨○庚戌工部議覆直隸總督趙宏燮奏長

垣縣之王家隄口因豫省黃河復發衝開新隄經臣飭令速行堵

築今甄家莊新堤已補築堅固惟康家道口一帶老隄又經衝開
十餘丈流注東明當下大埽以堵決處俟上流水勢稍定卽與王
家隄口一併修築應行該督嚴飭該營道府河官速行辦理從之
○王子論大學士九卿等用人行政朝廷之大權也文官銓選掌
之吏部武官遷除掌之兵部吏部論班論俸兵部論俸論銜從來
定例也其武官歷三年加銜調補之例甚善近來督撫提鎮題補
太多始不過州縣官千把總之類今則司道副參亦皆題補矣值
此用兵之際姑且行之此習若久大有關繫且伊等題補官員內
朕不知者甚多補用後卽皆稱爲奉旨補授之員諸臣皆讀書之
人何可不慮及此所有在京大小職官皆朕所選用賢否易知若
外省保奏之官非朕所素知豈能一一定其優劣乎爾等會同詳
議具奏

夏四月庚申封翁牛特一等台吉鄂器爾爲輔國公○辛酉禮部遵旨會議自伏羲氏以逮有明應入廟崇祀帝王及從祀功臣詳開一摺偏據一方不入正統及不應崇祀者詳開一摺具疏陳奏

上諭大學士等此所議應從祀處皆是但其中尙有宜詳細斟酌者從前所定從祀功臣大概開國元勳居多如明之徐達不過草莽武夫劉基係元之進士遭遇成功遂以元勳配享耳其有治安之世輔佐太平有功軍國者反不得與配享之列是皆未爲允當也又如有明天下皆壞於萬厯泰昌天啟三朝愍帝卽位未嘗不勵精圖治而所值事勢無可如何明之亡非愍帝之咎也朕年少時曾見故明耆舊甚多於明末事最切野史所載俱不足信愍帝不應與亡國之君並論萬厯泰昌天啟實不應入崇祀之內爾等會同九卿將此詳細分別確議具奏○癸亥以李繼謨爲廣西

按察使

由直隸通永道遷

○甲子命內閣學士阿克敦二等侍衛佛倫封

朝鮮國王李昫弟李吟爲世弟○丁卯 上巡幸塞外啟鑾○己

巳命撫遠大將軍允禩復往軍前○辛巳 上駐蹕熱河○暹羅

國王森烈拍照廣拍噶陸坤司由提呀菩埃遣使進貢○癸未福

州駐防兵譁將軍黃秉鉞不能輯 上命奪秉鉞職誅爲首者

五月壬辰禮部尙書賴都以揀選讀祝官不加詳愼降五級調用

○漕運總督施世綸以病乞休得旨施世綸著在任調理辦事催

趙漕船著侍郎張大有詹事顧爾泰去○戊戌施世綸卒以張大

有署漕運總督○辛丑封青海故多羅貝勒罔楚克阿拉卜坦弟

達錫策零爲固山貝子

六月己未諭大學士等去歲黃河泛溢流至直隸山東等處朕念

民生迺道關繫綦重特遣牛鈕齊蘇勒馬泰前往親爲指示於年

前俱已修完將見成完竣之工交與楊宗義楊宗義聽信上游居住小人無稽之言視爲甚易延至數月不豫爲幫築加謹看守以致衝決朕屢下嚴旨著令於雨水之前務必催修完竣若遇水大時便難堵築今竟至於此此河關數省之民生往來之糧艘朕日夜憂思望堵築完工之信楊宗義漫不經心既不多備料又不在工所監修但以銷算錢糧爲辭多方託故躲避今值雨水甚大之際以致修築將成之壩工又被衝決此工程關繫緊要著九卿詹事科道會同連議具奏○壬戌諭大學士等盛京地方屢歲豐收米穀價值甚賤民間或致濫費著令盛京米糧不必禁糶聽其由海運販買可傳諭盛京將軍府尹知之又諭暹羅國人言其地米甚饒裕價值亦賤二三錢即可買稻米一石朕諭以爾等米既甚多可將米三十萬石分運至福建廣東甯波等處販賣彼若果能

運至於地方甚有裨益此三十萬石係官運不必收稅○乙丑卹
進藏陣亡查掄插達爾第喀奔祿吳勒竝予世職有差○丙寅命
趙宏燮察賑長垣等縣田廬被水者○辛未浙江巡撫屠沂以病
乞休允之○命截留漕糧二十萬石分貯於天津霸州等處備荒
○丙子諭大學士等直隸總督趙宏燮病故地方緊要著刑部郎
中趙之垣加都察院右僉都御史銜署理直隸巡撫事務○辛巳
調呂猶龍爲浙江巡撫以石文焯署福建巡撫山江西按察使署○是月
免安徽休甯等十二州縣衛上年旱災額賦有差

東華錄

康熙一百十

臣王先謙敬編

臣周淪蕃恭校

秋七月丁酉征西將軍祁里德奏屯田於烏蘭古木請益兵防守
上命都統圖拉率兵赴之○己亥予故漕運總督施世綸祭葬
○壬寅議政大臣等議覆四川陝西總督年羹堯奏據西歲駐紮
之喇嘛楚爾齊木賊布及西藏辦事之知府石如金等呈稱在藏
官兵不睦因公策旺諾爾布軟弱副都統常齡侍讀學士滿都員
外郎巴特麻等任意生事除將原文緘封呈覽外若大兵不可即
撤應令滿都巴特麻自備行糧由西甯口外撤回若大兵撤回應
將官員留藏偵探信息沿途仍安設驛站遞送公文並於叉木多
設兵聲援以安達賴喇嘛等眾查西藏被賊擾害蒙 聖主獨斷

發兵往剿今藏地已定土伯特唐古特俱得拯救留兵防守乃年羹堯聽信喇嘛及知府微員捏造之語阻撓毀謗將軍大臣官員擅奏撤兵冒昧已極應將年羹堯嚴加議處得旨侍讀學士滿都員外郎巴特麻與知府石如金喇嘛楚爾齊木臧布著由西甯一路前來滿都員缺著署理西安布政使塔琳往藏跟隨將軍印務效力其在藏駐紮之四川綠旗兵丁恐其生事著署理巡撫事務色爾圖進藏管轄在彼駐紮色爾圖塔琳著年羹堯速行文令其馳驛前往四川巡撫員缺朕另行補授至西安布政使事務著年羹堯舉伊所知之人令其署理員外郎巴特麻員缺行文大將軍將彼處章京撥派一員卽令速行進藏與公策旺諾爾布一同辦事○乙巳 御書協順靈川額懸尖山江海潮神廟○戊申以蔡珽爲四川巡撫

由翰林院掌院學士遷

○予故直隸總督趙宏燮祭葬諡肅

敏○是月免甘肅固原州衛旱災額賦有差

八月丙辰 上行圍發熱河○丙寅停本年秋決○刑部奏已故福建革職提督藍理貪虐案內應追銀兩甚多今該督撫奏稱變賣藍理家產止得銀三萬八千二百餘兩明係隱匿應令地方官嚴追得旨藍理出征效力之處甚多又在阿爾泰軍前效力回來身故其家產著照督撫等察估完結其別項俱從寬免追藍理從前會治罪入旗著將伊妻子俱放歸原籍○己卯 上駐蹕汗特木爾達巴漢昂阿賜來朝外藩銀幣鞍馬及隨圍蒙古官兵銀布○禮部奏正紅旗蒙古都統晏布在出兵處病故請照例給予祭葬得旨晏布一介武夫朕擢用至都統往巴爾庫爾軍前並未效力捏稱馬無牧廠幾誤軍機大事將伊都統並本身效力所得之官俱著革退○庚辰諭大學士等據署理甘肅巡撫盧詢奏六七

月連次得雨又復概稱甘肅所屬地氣寒涼見今夏麥正在收穫有五六分者有七八九分者米價尙未能平朕臨御寰區殷殷以生民爲念凡各省人至必詳詢雨澤及收穫分數今年聞甘州肅州田禾甚佳年羹堯摺奏朕已洞悉且雨澤雖數百里之內尙有不同況甘州肅州所屬地方遼闊有數千里乎盧詢並不詳察聽信浮言以奏摺斷不發出將闔屬地方一概草率具奏盧詢於地方事務漫不經心奏朕之事不加謹慎妄行陳奏甚屬狂妄浮躁不堪殊玷署理之職著嚴飭行如再冒昧陳奏著拏解交送刑部○是月免浙江蘭溪等五縣旱災額賦有差

九月甲申 上還熱河○乙酉諭議政王大臣等從前曾有以朕每年出口行圍勞苦軍士條奏者不知國家承平雖久豈可遂忘武備前噶爾丹攻破喀爾喀並侵擾我內地扎薩克至烏蘭布通

朕親統大兵征討噶爾丹敗走後又侵犯克魯倫朕統兵三路並進至昭莫多剿滅之今策妄阿喇布坦無端侵犯哈密地方朕徵發阿爾泰及巴爾庫爾兩路兵進剿策妄阿喇布坦聞之心膽俱碎乃遣策零敦多卜等潛往西藏劫掠毀壞寺廟土伯特地方已被殘蝨朕又遣大兵前往擊敗策零敦多卜等復取西藏救土伯特於水火之中我兵直抵西藏立功絕域此皆因朕平時不忘武備勤於訓練之所致也若聽信從前條奏之言憚於勞苦不加訓練又何能遠至萬里之外而滅賊立功乎爾等諸臣咸宜知之○戊子諭扈從大學士尚書侍郎學士等據陝西巡撫噶什圖奏稱陝西虧空甚多若止於參革官員名下追補究竟不能速完查秦省州縣火耗每兩有加二三錢者有加四五錢者臣與督臣商議量留本官用度外其餘俱捐補合省虧空如此則虧空即可全完

等語朕謂此事大有關繫斷不可行定例私派之罪甚重火耗一項特以州縣官用度不敷故於正項之外量加些微原是私事朕曾諭陳瑨云加一火耗似尚可寬容陳瑨奏云此乃 聖恩寬大但不可明諭許其加添朕思其言深爲有理今陝西參出虧空甚多不得已而爲此舉彼雖密奏朕若批發竟視爲奏准之事加派之名朕豈受乎特諭爾等滿漢諸臣共知之○甲午諭扈從大臣等總督年羹堯將虧空錢糧各官奏參革職其虧空錢糧至今不能賠補今又因辦理軍需陝西巡撫噶什圖總督年羹堯會商將民間火耗加徵墊補等情奏請第民間火耗止可議減豈可加增朕在位六十一年從未加徵民間火耗今安可照伊等所奏加增乎且虧空錢糧之數雖多見今未有實在墊補之處由此觀之西安庫內未必有存貯銀兩今值此軍機需用之際而伊等以有虧

空延捥不敢奏請或致有誤緊要軍需亦未可定著交議政大臣會議將戶部庫銀撥送西安卽彼處庫內有銀亦令收貯如庫內無銀軍機需用之處一面動用一面奏聞○戊戌 上回鑾○甲辰 御書學道還道額懸蘇州紫陽書院○丁未 上駐蹕密雲縣閱視河隄○庚戌 上還京師

冬十月甲寅諭領侍衛內大臣侍衛等入旗都統前鋒統領護軍統領副都統參領等大學士九卿詹事科道直隸巡撫守道等朕臨御天下六十餘載年至古稀 太祖高皇帝時大臣官員幼時及見三分之一 太宗文皇帝時大臣官員猶見其半 世祖章皇帝時大臣官員俱曾全見明萬厯泰昌天啟崇禎時大臣官員及舊太監亦會有及見者朕凡事留心詢問故於前朝諸事知之甚悉御極以來常思事多變易皆難豫定惟寬平公正因時制宜

一切未嘗豫執己見孔子云寬則得眾信則人任焉朕宵旰憂勤無刻不以民生爲念凡政事利弊必推求其故近見天下錢糧各省皆有虧空陝西尤甚其所以致此者皆有根源蓋自用兵以來大兵經行之處督撫及地方官惟期過伊地方便可畢事因資助馬匹盤費衣服食物甚多倉卒閒無可設法勢必那用庫帑及撤兵時又給各兵丁馬匹銀兩卽如自藏回來之將軍以及兵丁沿途所得反多於正項是以各官費用動輒萬金人但知取用而已此等銀兩出自何項並無一人問及也官之虧空錢糧者俱已奏參離任其虧空銀兩追比不能卽得新任官又不代完此項銀兩終無著落故用兵之地歷年錢糧奏銷朕悉從寬緩正爲此也前蕩平三逆原任湖廣布政使徐惺所用兵餉至四十餘年尙不能清完朕念皆係軍需那用將未完銀兩俱從寬免蓋寬緩則州縣

力舒上可不誤國帑下可不病民力去年陝西督撫奏參虧空各官奏請將此虧空銀兩追出以充兵餉後追比不得伊等無可奈何巡撫噶什圖密奏欲加通省火耗以完虧空此摺朕若批發便謂朕令加徵若不批發又謂此事已曾奏明竟自私派定例私派之罪尤重火耗一項特以州縣官供應甚多故於正項之外畧加些微以助常俸所不足原屬私事若公然如其所請聽其加派則必致與正項一例催徵將肆無忌憚矣所以將噶什圖奏摺申飭發出第陝西督撫既不能追比虧空又不敢請撥錢糧儻有緊要軍機焉能不致遲誤朕因交與議政大臣動戶部庫帑解送矣又如賑濟一事自應於夏麥無收之後散賑方於百姓有益今各省每於三四月閒或遇有冰雹或雨澤愆期卽借此以爲青黃不接具奏請賑冒銷倉穀及五六月時民間乏食而倉中已顆粒無存

矣且今年陝省地震因言倉糧朽爛奏請蠲免夫地震何至糧朽此皆州縣官借端開銷耳今各省雖有虧空而陝省尤屬緊要特傳集爾等面諭其噶什圖所奏虧空錢糧一摺交與九卿詹事科道確議具奏○辛酉諭議政大臣等倉糧關繫甚要放米時理應一廩放畢再放一廩今聞此廩米石支領方半又向別廩支領所賸米少而所占之廩甚多又支領白米時諸王公主等屬下之人不按應放之廩領米而揀廩霸占支領者有之此等斷然不可理應按廩支領如廩內餘米一半者卽是弊端應將此徹底清查若遣他人亦未能辦著和碩雍親王帶領宏昇延信孫渣齊隆科多查弼納吳爾台前往會同張大有查勘再從前倉內每日進廩之米至四萬石進米多則於回空糧船有益至於米色之變不在收貯卽如昭五達地方所貯米石歷四十年米色照常並未霉爛今

倉廩有損漏者著卽修理廩座如不敷用著卽添造○甲子以納

齊喀爲山西布政使

由郎中遷

○戊辰以左都御史安飴爲杭州將軍

○庚午

和碩雍親王奏臣等遵旨查勘通州西中南三倉共三

百七十六廩除支放已空者七廩外其餘各廩所貯之米及露囤米四百六十一圍通共米五百一十三萬九千石有奇內未經支放好米二百七十六廩已經支放尙有餘賸米一半者四十八廩又變色之米得半者四十五廩因此變色之米占留廩內致新米不得歸廩而多入露囤被雨蒸潮易致霉爛請遣部院大臣一員同倉場總督張伯行先將此變色之米照減價例悉行糶賣則所占之廩旣空而露囤之新米亦得歸入廩內至於放米領米之例誠不可不定嗣後諸王以下領米時務各按廩支領俟此廩旣空再放別廩儻仍前揀廩占領遺賸半廩者該監督卽報倉場總督

奏參將領米官員交部嚴加議處放此米時每旗派參領一員監視約束如該監督不將好米給與而攙雜變色之米勒令支領亦許領米官員呈告倉場總督將該監督奏參交部嚴加議處查定例支領米石限兩月領完若有無故延挨踰限者即停止給與如係該監督勒措遲延亦即將該監督奏參議處又據倉場總督阿錫鼐張伯行云舊監督任內之米或米色霉變額數有虧新監督勢難接受若勒令接受則彼此互虧愈難究結是以將此等虧額之舊監督奏參仍令伊等留倉監放俟完日查明追賠治罪等語查康熙五十一年以前虧額留倉之舊監督穆欽等任內米石亦尚有餘贖半廠者應令新監督分別米色呈驗倉場總督其未經變色者歸併一色好米廠內以便支放其已經霉變七成以下者遷貯露囤即行糶賣並行文直隸巡撫派各屬州縣設法運去俟

來春糶賣於民間大有裨益此外又有抵給倉役工價之米堆積
廠外霉爛成灰原不在數內恐有不肖之徒將此攪雜充數鋪墊
廠底亦未可定請給與耕種之民聽其量力運去以肥田畝有益
若其中尙有成色之米仍行減價糶賣如此則倉無混占之廠地
無委棄之粟矣再查米色之霉變多由廠舍之損漏通州各倉應
大修者五十廠應小修者一百三十二廠又三倉舊制各有一百
八十八廠若將新舊之米並貯似屬不敷應於各倉空地添造十
二廠以足二百之數請交與工部確估修理添造再查通倉惟支
放俸米所用少而存貯日久陳陳相因京倉米石所用甚多不若
於京師城垣下另建一倉收貯便於支放亦請交工部相度處所
確估建造至於糧艘到後按時將米催卸入倉每日可進五萬七
千六百石之數已嚴飭倉場坐糧廳等照此催卸自不致貽誤回

空糧肢矣得旨依議○辛未以查弼納爲江南江西總督由兵部右侍郎

○癸酉 上幸南苑行圍○以李樹德爲福州將軍謝賜履爲

山東巡撫由候補按察使遷○以黃國材爲福建巡撫由鴻臚寺卿遷李馥爲浙

江巡撫由安徽布政使遷○丁丑以阿克敦爲兵部右侍郎由內閣學士遷○戊

寅大學士九卿詹事科道等以來年恭遇 萬壽七旬大慶請行

慶賀典禮 上諭大學士等覽所奏皆過於實事朕以沖齡卽位

賴 世祖章皇帝定鼎以來深仁厚澤建不拔之業至今八十年

四海昇平有自來矣朕自幼讀書每覽前代帝王忿懣憂患累其

內幾務紛紜勞其外年歲不久景祚不長者未嘗不拊髀長歎朕

涼德亦不過如此幸得厯逾花甲年登古稀鬢眉皓白總理萬幾

當此之際翼翼小心惟恐善後之策不能豫料保泰圖安夙夜冰

兢況今西陲用兵士卒暴露轉運罷敝民生乏食物價騰貴正宜

君臣同寅協恭乂安萬姓永致太平自古慶賀多者後人不取況亦何益乎朕御極六十餘年元旦之外未嘗受賀惟六十壽時三月十八日進表行禮今卿等所請無庸多議

十一月乙酉以石文焯爲安徽布政使

由江西按察使遷

趙宏運爲湖北

按察使

由湖廣岳常道遷

○丁亥

和碩雍親王奏查勘京城海運八倉

清河本裕一倉通共五百六十二廩又有院內露囤共十五圍此

內秋季支放已空者五十一廩見在滿貯未經支放者二百五十

九廩支放餘賸一半者一百三十六廩俱屬好米共三百六十九

萬六千八百石有奇其變色之米七成亦已經支放餘賸一半者

八十五廩並露囤之米共七十萬二千九百石有奇變色不等應

分別糶賣支放三十一廩並露囤之米共二十四萬九千一百石

有奇應將此米交該監督查造清冊報倉場總督驗明應糶賣者

羅賣應支放者支放其變色之米七成以下亦報倉場總督驗明
照通倉例羅賣如兵丁願代小米支放者准其支領若餘賸半廩
之好米悉令歸併同色廩內則一轉運閒空廩不少可以悉貯新
米矣至京倉之米應給上三旗包衣佐領五旗王等包衣佐領及
八旗兵丁執事人等其放米領米之時亦令各旗派官一員監視
務令按廩支領嚴禁揀廩越占放此米時亦定限於兩月領完逾
限者停其給與該監督若將變色之米攪雜充數及有勒措遲延
等情各報倉場總督奏參嚴加治罪餘悉照通倉例一體遵行若
抵給倉役工價之米霉成灰者亦聽耕種之人領取運出內有成
色之米亦仍收貯羅賣又查本裕倉內每年例派進米二十萬石
按季支放俸糧止於十三萬石歷久餘賸囤積廩舍不敷另貯露
囤致有霉變嗣後請令倉場總督停止例派之數酌有空廩可貯

然後運貯再查各倉修理損漏之處應大修者三十八廠小修者一百八十四廠應交工部速行確估修理查各倉應行增建之數海運等八倉俱有隙地可增建四十二廠太平倉迤南沿河一帶可增建二十五廠至於朝陽門至東直門另建一倉前曾奏請今經詳閱地勢可增建四十二廠亦應一併交工部速行確估建造得旨該部議奏又奏倉糧關繫甚要收貯之責全在監督米色攸殊卽監督優劣所定也查原任監督穆欽彭象晉吳爾賽文桂王鳳孫卓洛郭疏麟謝載秩顏伯王國治達蘭泰各員任內收貯米石疏忽致多霉爛額數有虧遲延交代俱經該總督奏參應交與新任監督作速清查如尙有餘賸之米在廠該總督驗明米色速行支放糶賣俟完日照虧欠之數著落伊等家產賠補本身交部嚴加議處其原任監督張坦麟索柱張嵩年圖密善金南瑛等任

內米石加謹收貯交代明白而索柱張嵩年及見在之新任監督
禪齊布張登傑復捐貲修理廩舍應請交吏部議敘至於見任監
督景古爾岱呂文櫻弼錫納陳守創吳隆元佛海劉公津哲爾金
高輝等任內米石額數既足收貯亦謹俟伊等任滿交代令倉場
總督查明具奏臣等查得米石霉變皆由新舊監督互相推諉不
受交代遷延日久所致嗣後應令倉場總督於新舊監督交代之
時查看明晰如可接受者卽令新監督接受不得推諉遲延貽誤
倉糧如米色霉變不可接受者卽行聲明參奏將好米交新任監
督收管其霉變虧少米石著舊任監督賠補仍交與該部嚴加議
處得旨該部議奏○戊子 上不豫自南苑回駐暢春園○己丑
免山西平陽汾州二府澤沁二州所屬州縣衛所康熙六十年分
旱災額賦有差○庚寅 上因聖躬不豫十五日 南郊大祀特

命 皇四子和碩雍親王恭代 皇四子以 聖躬違和懇求侍
奉左右 上諭郊祀 上帝朕躬不能親往特命爾恭代齋戒大
興必須誠敬嚴恪爾爲朕虔誠展祀可也 皇四子遵旨於齋所
致齋

十二月甲子丑刻 上疾大漸命趣召 皇四子於齋所諭令速
至 南郊祀典著派公吳爾占恭代寅刻召皇三子誠親王允祉
皇七子瀋郡王允祐皇八子貝勒允禩皇九子貝子允禔皇十子
敦郡王允禔皇十二子貝子允禔皇十三子允祥理藩院尙書隆
科多至 御榻前諭曰皇四子人品貴重深肖朕躬必能克承大
統著繼朕登基卽皇帝位 皇四子聞召馳至己刻趨進寢宮
上告以病勢日臻之故是日 皇四子三次進見問 安戌刻
上崩於寢宮○遺詔曰從來帝王之治天下未嘗不以敬 天法

祖爲首務敬

天法

祖之實在柔遠能邇休養蒼生共四海

之利爲利一天下之心爲心保邦於未危致治於未亂夙夜孜孜寤寐不遑爲久遠之國計庶乎近之今朕年居七旬在位六十一年實賴天地宗社之默佑非朕涼德之所致也歷觀史冊自黃帝甲子迄今四千三百五十餘年共三百一帝如朕在位之久者甚少朕臨御至二十年時不敢逆料至三十年三十年時不敢逆料至四十年今已六十一年矣尙書洪範所載一曰壽二曰富三曰康甯四曰攸好德五曰考終命五福以考終命列於第五者誠以其難得故也今朕年已登耆富有四海子孫百五十餘人天下安樂朕之福亦云厚矣卽或有不虞心亦泰然念自御極以來雖不敢自謂能移風易俗家給人足上擬三代明聖之主而欲致海宇昇平人民樂業孜孜汲汲小心謹慎夙夜不遑未嘗少懈數

十年來殫心竭力有如一曰此豈僅勞苦二字所能該括耶前代帝王或享年不永史論概以爲酒色所致此皆書生好爲譏評雖純全盡美之君亦必挾摘瑕疵朕今爲前代帝王剖白言之蓋由天下事繁不勝勞憊之所致也諸葛亮曰鞠躬盡瘁死而後已爲人臣者惟諸葛亮能如此耳若帝王仔肩甚重無可旁談豈臣下所可比擬臣下可仕則仕可止則止年老致政而歸抱子弄孫猶得優游自適爲君者勤劬一生了無休息之日如舜雖稱無爲而治然身歿於蒼梧禹乘四載胼手胝足終於會稽似此皆勤勞政事巡行周歷不遑甯處豈可謂之崇尚無爲清淨自持平易遞卦六爻未嘗言及人主之事可見人主原無宴息之地可以退藏鞠躬盡瘁誠謂此也自古得天下之正莫如我朝 太祖 太宗初無取天下之心嘗兵及京城諸大臣咸云當取 太宗皇帝曰明

與我國素非和好今欲取之甚易但念係中國之主不忍取也後
流賊李自成攻破京城崇禎自縊臣民相率來迎乃剪滅闖寇入
承大統稽查典禮安葬崇禎背漢高祖係泗上亭長明太祖一皇
覺寺僧項羽起兵攻秦而天下卒歸於漢元末陳友諒等蠭起而
天下卒歸於明我朝承席 先烈應 天順人撫有區宇以此見
亂臣賊子無非爲眞主驅除也凡帝王自有天命應享壽考者不
能使之不享壽考應享太平者不能使之不享太平朕自幼讀書
於古今道理粗能通曉又年力盛時能彎十五力弓發十三把箭
用兵臨戎之事皆所優爲然平生未嘗妄殺一人平定三藩掃清
漠北皆出一心運籌戶部帑金非用師賑饑未敢妄費謂此皆小
民脂膏故也所有巡狩行宮不施采繪每處所費不過一二萬金
較之河工歲費三百餘萬金尙不及百分之一昔梁武帝亦勸業

英雄後至盡年爲侯景所逼遂有臺城之禍隋文帝亦開荆之主不能豫知其子煬帝之惡卒致不克令終皆由辨之不早也朕之子孫百有餘人朕年已七十諸王大臣官員軍民以及蒙古人等無不愛惜朕年邁之人今雖以壽終朕亦愉悅至太祖皇帝之子禮親王饒餘王之子孫見今俱各安全朕身後爾等若能協心保全朕亦欣然安逝雍親王皇四子人品貴重深肖朕躬必能克承大統著繼朕登基卽皇帝位卽遵典制持服二十七日釋服布告天下咸使聞知○己巳恭上 尊諡曰 合天弘運文武睿哲恭儉寬裕孝敬誠信中和功德大成 景陵○乾隆元年三月乙巳加上 尊諡曰 合天弘運文武睿哲恭儉寬裕孝敬誠信中和功德大成 仁皇帝 上在位六十一年壽六十有九 上仁孝性成智勇天

錫早承大統親奉 重闕尊養兼隆竭誠致愛敬 天法 祖對

越維虔敷政甯人孜孜罔倦御門聽政日理萬幾講幄紬書寒暑
不輟當三逆背恩負嶠蠢動西南半壁所在震驚 上睿謨廣運
命將專征指授方畧不動聲色而元兇巨憝以次削平遂下臺灣
征羅刹喀爾喀鄂羅斯稽顙請附厄魯特噶爾丹奔亡授首 天
威所讐西藏傾心疆宇之廣極於無外雖曰守成實同勦造焉暑
雨祁寒惟以四海蒼生爲念小有災祲蠲租賜復動逾千萬寬大
之詔史不絕書愷澤所流歲無虛月又復愼刑恤獄爰書覆奏必
至再三好生之德洽於民心眷禮親賢保全勲舊辨材任官靡不
稱職崇儒重道登闕里之堂升考亭之配萬幾餘暇 御纂經書
性理集羣聖之大成以是廣厲士風故人材奮興道同風一又以
河防務重屢勅 鑒輅指示機宜遂得地平天成一勞永逸至

聖學高深含經味道染翰則光騰雲漢鳳翥鸞翔摛文則祕挾圖書金聲玉振以至天文厯數樂律義圖莫不構思造微研幾入妙非臣下淺識所能窺測也史氏稱漢文景之際刑措不用幾至太平又稱唐貞觀中斗米三錢終歲斷刑止二十九人又云宋仁宗在位四十二年刑以不殺爲威財以不蓄爲富兵以不戰爲功並書之典冊以爲美談 上臨御日久超越往代六十一年中兵不觀而壯財不聚而豐政教不肅而成風俗不言而喻光天之下至於海隅蒼生鼓腹嬉遊熙熙皞皞樂其樂利其利民日遷善而不知豈漢唐而下所得同年而語者哉昔人謂貞元會合之運在唐虞宇宙間至成周而再見 上久道化成深仁厚澤無遠弗居含生有識淪於骨髓浹於肌膚下至昆蟲草木並育於太和黃髮兒齒同臻於壽域信乎貞元會合之運兼唐虞成周而有之矣傳曰

爲人君止於仁於戲自生民以來未有盛於此者也